

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haberi

BESPLATAN PRIMJERAK • SEPTEMBAR, 2015. broj 27.

Strošići: Novi asfalt za bolji život

Sadržaj

- 2-3 Rekonstruisana ulica Strošići
- 4 Izgradnja kanalizacione mreže ispod Višegradske kapije
- 5 Rekonstrukcija Bašćaršijskog trga
- 6 Sjednice Općinskog vijeća
- 10 Izgradnja i sanacija potpornih zidova
- 11 Asfaltiranje ulica
- 14-15 Komunalni projekti
- 18-19 Staro Sarajevo: Šokak Non Pasaran - Čuvari Adresa



Impressum

- Izdavač:** Općina Stari Grad Sarajevo
- Tiraž:** 2.000
- Pripremili:** Almedina Porča
Alma Imamović
- DTP:** Safet Mališević
- Fotografije:** Safet Mališević
- Štampa:** "Pentagram" d.o.o.
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Tel./fax:** +387 33 282 385
+387 33 217 916



Projekti



Rekonstruisana ulica Strošići: „Na ovo smo čekali 70 godina“

Postavljene nove vodovodne i kanalizacione cijevi, plinske i telekom instalacije, te asfaltirano više od 900 m² ulice

Dugo očekivana rekonstrukcija centralnog dijela ulice Strošići na Vratniku je završena. Građanima koji žive u Strošićima, život je mnogo lakši i ljepši nakon što je ulica asfaltirana.

S obzirom da je projekat rekonstrukcije ulice bio vrlo zahtjevan, zbog velikog broja kuća koje se nalaze u njoj i koje su sagrađene uz samu ulicu, radovi su iziskivali dodatni trud i vrijeme.

U sklopu prve faze projekta urađena je izmjena kompletne infrastrukture. Postavljene su nove vodovodne cijevi u dužini od oko 400 metara, dok je skoro 700 metara cijevi položeno za kišnu i fekalnu kanalizaciju. U ulici je urađeno

98 priključaka na fekalnu kanalizaciju i 97 priključaka oluka na odvođe za oborinske vode. Postavljene su nove plinske i telekom instalacije, a ukupna površina asfaltirane ulice je 938m².

Finansijeri ovog velikog projekta su Ministarstvo prostornog uređenja Kantona Sarajevo i Općina Stari Grad Sarajevo. Vrijednost izvedenih radova je oko 380.000 maraka. Izvođač radova je bila firma „Mibral“ iz Sarajeva.

Građani izrazili zahvalnost

Mještani ulice Strošići, u znak zahvalnosti za izvedene radove, pozvali su one koji su pomogli u realizaciji projekta da zajedno, uz šerbe i halvu, proslave okončanje prve faze radova.



Šerbe i halva za radnike i goste

Sa radošću u očima, uz šerbe i halvu dočekala nas je Vezira Tukić, koja u ovoj ulici živi od 1969. godine od kada se udala. Kako kaže, nije znala način na koji bi se zahvalila načelniku Općine Ibrahimu Hadžibajriću koji je imao sluha da pokrene ovaj ogromni projekat, pa je organizovala proslavu.

„Ne znam šta da vam kažem, toliko sam sretna da vam to ne mogu opisati. Dugo, dugo godina čekali smo ove radove. Jako me je boljelo to što su mnogi ovu ulicu nazivali 'koziji put'“, priča Vezira. Dodaje kako je htjela da se u ime svog muža Hajrudina, koji je nažalost preselio i nije dočekao ovaj sretni dan, zahvali svima koji su doprinijeli realizaciji projekta.

S nanom Vezinom je bio i njen

dvanaestogodišnji unuk Faris Tukić, koji pohada sedmi razred Osnovne škole „Saburina“ i koji kaže da sada lakše ide u školu. Faris je zajedno s nanom ugostio i poslužio sve prisutne goste, te radnike koji su prethodnih mjeseci vrijedno radili u njihovoj ulici.

Bolji uslovi života

Među prisutnim mještanima bio je i penzioner Mujo Hamzić, za kojeg radnici iz firme koja je izvodila radove u šali kažu da im je bio „desna ruka“. Pričaju kako je dao veliki doprinos prilikom izvođenja radova i da je znao svaki kamen i šaht u ulici, te je priskakivao u pomoć radnicima kad god bi nešto zatrebalo.

„I zadnju kap krvi bih dao za ovu ulicu. Ovdje sam se rodio i tu živim od



Vezira Tukić organizovala proslavu

1949. godine. Na ovo smo čekali 70 godina i sada sam prezadovoljan“, ističe Mujo. Dodaje kako je komisija, koja je dolazila da vidi u kakvom je stanju ulica, bila iznenađena da se tu uopšte može živjeti.

Kako kaže Belma Kutlovac, sekretar Mjesne zajednice Vratnik, ovom rekonstrukcijom su znatno popravljani uslovi života za stotinjak domaćinstava ove ulice.

„Ovdje je najveći problem bila kanalizacija koja se izljevala po ulici. Po reakcijama ljudi s kojima se susrećem u Strošićima vidim da su prezadovoljni. Sada će biti mirni godinama. Olakšao im se život u svakom smislu“, priča Belma.



Novi kišni i fekalni odvod

U planu i druga faza radova


S obzirom da je prva faza rekonstrukcije ulice Strošići, koja je podrazumijevala centralni dio završena, da bi projekat u cijelosti bio okončan, planirana je rekonstrukcija pet krakova ulice, koja će se raditi u sklopu druge faze. Početkom augusta, 2015. godine potpisan je Sporazum o sufinansiranju projekata iz budžeta Kantona Sarajevo za 2015. godinu od namjenskih sredstava – vodne naknade. Potpisani sporazum predviđa sufinansiranje druge faze radova rekonstrukcije ulice Strošići, u iznosu od 200.000 KM. Sredstva će obezbijediti Ministarstvo komunalne privrede i infrastrukture Kantona Sarajevo.



Mujo Hamzić pomagao radnicima

Projekti

Izgradnja kanalizacione mreže ispod Višegradске kapije



Općina rješava dugogodišnji problem stanovnika ovog naselja • Kanalizacija se odvodi i cijevima ispušta niz padinu...Oko 30 domaćinstava dobit će pojedinačne priključke

Stanovnici vratničkog naselja ispod Višegradске kapije, nakon više godina dobit će priključnu kanalizacionu mrežu na postojeću fekalnu kanalizaciju. Time će Općina Stari Grad riješiti dugogodišnji problem ovih građana koji, od izgradnje kuća na ovom dijelu, nemaju riješeno pitanje kanalizacionih cijevi i odvoda. Općina je naručila izradu projekta izgradnje priključne kanalizacione mreže prije dvije godine, no kako se radi o izuzetno teškoj trasi, strmoj i stjenovitoj, izrada projekta nije bila nimalo jednostavan

zadatak. Projekat je izradila firma ES Hydrotehnics d.o.o. iz Sarajeva, a bile su potrebne i određene korekcije i dorade. Nakon provođenja procedure izbora izvođača radova, te obezbjeđivanja potrebnih sredstava, konačno su se stekli uslovi za realizaciju, te su radovi na izgradnji nove kanalizacione mreže počeli krajem septembra.

Postavljanje 250 metara cijevi

U ovom naselju koje se nalazi na samoj litici, ima više od 30 domaćinstava. Svi postojeći objekti imaju riješeno vodosnabdijevanje iz gradske vodovodne mreže, ali nema izgrađene gradske kanalizacione mreže. Iz objekata je izvedena tzv. interna kanalizacija koja se cijevima odvodi i ispušta niz padinu, a dio objekata svoje sanitarno-fekalne otpadne vode ispušta u improvizovane septičke jame koje se ne mogu prazniti cisternama zbog nepristupačnog terena. Nepostojanje propisno izvedene kanalizacione mreže uzrokuje veoma loše higijenske uslove i kvalitet života stanovništva ovog dijela Vratnika.

Nakon dugotrajnih pregovora koje je Služba za investicije, komunalne i inspe-

kcijske poslove vodila sa KJKP "Vodovod i kanalizacija" postignut je dogovor o priključivanju ovih domaćinstava na gradsku kanalizacionu mrežu. Bit će priključeno oko 30 domaćinstava i postavljeno više od 250 metara kanalizacionih cijevi. Ponudeno rješenje predviđa umrežavanje domaćinstava pojedinačnim priključcima na dva odvojena voda prema javnoj gradskoj kanalizacionoj mreži, kao što je prikazano na pratećim fotografijama. Zbog zahtjevnosti trase, radit će se i posebni šahtovi za usporavanje dinamičkog udara.

Vrijednost ove investicije, koju finansira Općina Stari Grad, je 138.792 KM.

Gradani nestrpljivo čekali radove

Kako su kazali iz mjesne zajednice Vratnik, građani su s nestrpljenjem čekali početak ovog projekta koji će riješiti njihov problem star desetinama godina. "Gotovo svakodnevno građani su dolazili da pitaju kada će početi gradnja kanalizacije. Neki od njih su otkazali godišnje odmore kako bi bili ovdje u vrijeme početka radova," kazali su iz mjesne zajednice.



Nova kanalizacija za 30 domaćinstava



Počela rekonstrukcija Bašćaršijaskog trga

Radovi će trajati 90 dana, a bit će zamijenjene sve podzemne instalacije • Zajednički projekat općina Osman Gazi i Stari Grad

Rekonstrukcija Bašćaršijaskog trga, najveći infrastrukturni projekat u Općini Stari Grad od početka ove godine, počela je 02. septembra. Uposlenici i mehanizacija firme "Neimari" d.o.o. tog jutro osigurali su i ogradili gradilište, te počeli uklanjanje kamenog sloja, ploča koje su postavljene prije više od 30 godina.

"Ploče na trgu postavljene su posljednji put 1982., dvije godine prije Zimskih olimpijskih igara. Ali, ni tada nisu mijenjane instalacije, koje su stare više od 70 godina. Sada će sve one biti promijenjene, a trg će biti popločan kao Sarači i Bravadžiluk," izjavio je Ibrahim Hadžibajrić, načelnik Općine Stari Grad.

Projekat je vrijedan 1,2 miliona KM

Projekat rekonstrukcije najstarijeg starogradskog trga podrazumijeva izmjenu kompletne infrastrukture. Uradit će se rekonstrukcija vodovodne i kanalizacione mreže, fekalne i oborinske kanalizacije, a bit će zamijenjene i ostale instalacije. Sarajevogas, Elektrodistribucija i BH Telecom izvršit će sanaciju svoje mreže, a po završetku svih radova Bašćaršijaski trg bit će popločan. Za završni sloj predviđene su kamene ploče od jablaničkog rodolita, iste one kojima

je prethodno rađena i rekonstrukcija ulica Sarači i Bravadžiluk.

Iz Službe za investicije, plan i analizu Općine naglašavaju da su za izvođenje radova prikupljena sva potrebna odobrenja, kao i saglasnost na projektnu dokumentaciju od strane Federalnog ministarstva kulture i sporta i Zavoda za zaštitu spomenika.

Projekat je vrijedan oko 1,2 miliona konvertibilnih maraka, a finansiraju ga u jednakim omjerima Općina Stari Grad Sarajevo i njena pobratimska Općina Osman Gazi (Bursa) iz Republike Turske.

Implementator projekta je Turska uprava za međunarodni razvoj i saradnju (TIKA), koja ja provela proceduru izbora izvođača radova, te upravlja sredstvima koje su joj za rekonstrukciju trga uplatile pomenute općine. Radove izvodi firma "Neimari" d.o.o.

Radovi će biti završeni u decembru

U vrijeme pripreme ovog biltena, na Bašćaršijaskom trgu bilo je završeno polaganje glavnog voda fekalne kanalizacije, a počelo je priključivanje okolnih objekata na fekalne i oborinske odvode. Također, počelo je postavljanje kamenih ivičnjaka, a na jednom dijelu trase firme Elektrodistribucija, Sarajevogas i BH Telecom vrše intervencije na svo-

joj infrastrukturi. Postavljeno je više od 150 metara vodovodnih instalacija. Sa Bašćaršijaskog trga uklonjeno je 90% kamenih ploča i betonske podloge.

Rok za završetak radova je 90 dana.

Osman Gazi osigurao sredstva prošle godine

Načelnik Ibrahim Hadžibajrić i načelnik pobratimske Općine Osman Gazi iz turskog grada Bursa Mustafa Dundar potpisali su ugovor o novčanoj donaciji za obnovu Bašćaršijaskog trga u februaru, 2014. godine. Nakon toga, Općina je morala obezbijediti neophodne tehničke uslove, kao i ostatak sredstava za projekat. Radovi su prolongirani u martu zbog turističke sezone i počeli su 02. septembra, ove godine.



Općinsko vijeće

30. sjednica

Općinskog vijeća

Općinsko vijeće Stari Grad utvrdilo je na 30. redovnoj sjednici, održanoj 27. jula, Nacrt odluke o prodaji poslovnih prostora i uputilo ga u javnu raspravu u trajanju od 45 dana. Pravni osnov za donošenje ove odluke je Zakon o stvarnim pravima Federacije BiH. Donošenjem istog, stvorila se potreba da se podzakonskim aktom reguliraju odredbe koje se tiču raspolaganja nekretninama u vlasništvu Općine Stari Grad, a odnose se na članove zakona koji reguliraju pravo preče kupnje i započete postupke po starim propisima. Subjekti koji mogu učestvovati u javnoj raspravi su Općinsko vijeće, radna tijela, političke stranke/klubovi, udruženja obrtnika/privrednika i drugi, a svi prijedlozi i sugestije moraju se dostaviti u pismenoj formi Službi za imovinsko-pravne, geodetske poslove, katastar i stambene poslove. Općinsko vijeće je stavilo van snage Odluku o kupovini vozila Kliničkom centru Univerziteta u Sarajevu za



Sa sjednice Općinskog vijeća

potrebe prevoza pacijenata oboljelih od karcinoma, usvojenu na 25. sjednici, te odobrilo nabavku vozila za potrebe Općine Stari Grad Sarajevo u iznosu od 25.000 KM. Također, Vijeće je usvojilo Odluku da Općina Stari Grad Sarajevo

donira Kliničkom centru Univerziteta u Sarajevu svoje vozilo marke "Škoda Roomstar" za potrebe prevoza pacijenata oboljelih od karcinoma. Općinsko vijeće je razmatralo i Prijedlog zaključka po zahtjevu za izmjenu naziva ulice Abadžin put. Usvojen je zaključak da se zadužuje Kolegij Općinskog vijeća Stari Grad da sa Službom za investicije, komunalne i inspeksijske poslove, Sektorom za poslove mjesnih zajednica i Komisijom za obrazovanje, kulturu i kulturno-historijsko naslijeđe pripremi i Općinskom vijeću prezentira normativni akt kojim će biti regulisan postupak izmjene i davanja naziva ulicama, trgovima itd. Podnosilac zahtjeva će potom biti obaviješten o usvajanju pomenutog akta, te će u skladu sa njegovim odredbama moći podnijeti novi zahtjev za izmjenu naziva ulice. Ovome se pristupilo zbog sve većeg broja zahtjeva za izmjenu naziva ulica, a nepostojanja normativnog akta kojim se taj postupak definiše.

31. sjednica

Općinskog vijeća

Na 31. sjednici Općinskog vijeća Stari Grad usvojen je Zaključak o izdavanju sredstava za pomoć izbjeglicama iz Sirije, te je zadužen načelnik Općine da obezbijedi sredstva u iznosu od 30.000 KM u svrhu pomoći sirijskim izbjeglicama u Srbiji i Makedoniji i dostavi ih putem humanitarne organizacije Merhamet. Kako se izbjeglice nalaze u izuzetno teškoj situaciji, zaključeno je i da se ova akcija treba provesti bez odlaganja. Općinsko vijeće je dalo saglasnost za potpisivanje Memoranduma o razumijevanju s ciljem podrške radu ustanovama kulture od općeg značaja i interesa za BiH, za period 2016/2018. godina, koji je upućen od strane Ministarstva civilnih poslova BiH. Potpisivanjem Memoranduma, Općina Stari Grad na godišnjem nivou izdvajati će 50.000 KM za podršku ustanovama kao što su Zemaljski muzej, Biblioteka za slijepa



Podrška radu ustanovama kulture

i slabovidna lica, Historijski muzej i sl, a ubuduće se budžetom neće planirati posebni grantovi namijenjeni za podršku ustanovama kulture, kao što je to dosad bio slučaj.

Nakon trećeg provedenog Javnog poziva za izbor člana Općinske izborne komisije Stari Grad Sarajevo, većinom

glasova izabrana je Nada Dimitrijević. Vijeću je predočena informacija o toku realizacije projekta HUB 387 koji su podržali na jednoj od ranijih sjednica. Trenutno se radi na pripremama za izradu urbanističkog rješenja objekta, odnosno izradi idejnog projekta ove moderne građevine. Vijeće je usvojilo zaključak kojim se utvrđuje da je ovaj projekat od interesa za Općinu Stari Grad i saglasno je da općinski Načelnik poduzme sve potrebne aktivnosti u cilju njegove što brže realizacije. Prihvaćen je i zaključak o upućivanju Pisma namjere o bratimljenju sa Općinom Fatih, Istanbul. Općinsko vijeće usvojilo je prijedlog odluke o prodaji poljoprivrednog zemljišta na Borijama koje je u vlasništvu Općine. Početna tržišna prodajna cijena zemljišta površine 69.410 m², čini ukupnu sumu u iznosu od 277.640,00 KM.

Obnovljene veze sa Općinom Fatih



U kabinetu načelnika Mustafe Demira

Načelnik Općine Fatih u Istanbulu, Mustafa Demir, početkom augusta primio je u zvaničnu posjetu delegaciju Općine Stari Grad. Povod za ovu posjetu bilo je ponovno uspostavljanje pobratimskih veza između Fatiha i Starog Grada. Naime, ove dvije općine koje se nalaze u najstarijem dijelu gradova kojim pripadaju, i u sebi baštine najveći broj kulturno-historijskih znamenitosti, te su slične po mnogočemu, bratimile su se 1990. godine. Međutim, s vremenom su se ove veze pokidale, te je delegacija Starog Grada posjetila Fatih kako bi se ponovo

uspostavili dobri odnosi između općina.

Načelnik Demir je prihvatio ideju ponovnog bratimljenja istakavši da je Fatih bratimljen sa samo dvije općine, ali da Stari Grad i Sarajevo svakako zaslužuju posebno mjesto. Na 31. sjednici Općinsko vijeće Stari Grad usvojilo je Pismo namjere o bratimljenju Općine Stari Grad sa Općinom Fatih, koje je potom upućeno u ovu istanbulsku općinu. Općina Fatih je jedna od najvećih u Istanbulu i broji oko jedan milion stanovnika, te ima godišnji budžet u iznosu od 90 miliona eura.

Delegacija Općine posjetila pobratimski Gostivar



U posjeti pobratimskom Gostivaru

Delegacija Općine Stari Grad boravila je krajem juna u prvoj zvaničnoj posjeti Općini Gostivar u Republici Makedoniji. Povod za posjetu bila je je proslava Dana Općine Gostivar. Svečana sjednica povodom Dana Općine Gostivar održana je 29. juna, a prisutnima se obratio i načelnik Ibrahim

Hadžibajrić.

Sporazum o saradnji i bratimljenju, Stari Grad i Gostivar potpisali su 16. decembra, 2013. godine, a on podstiče općine na međusobno povezivanje građana, efikasnu saradnju, susrete kroz kulturno-sportske manifestacije, ali i uzajamne posjete.

U posjeti pobratimskoj Općini Silivri, Istanbul



U kabinetu načelnika Ozcana Isiklara

Delegacija Starog Grada boravila je u augustu u zvaničnoj posjeti pobratimskoj Općini Silivri u Istanbulu. Tokom prijema kod načelnika Ozcana Isiklara definisani su detalji sufinansiranja projekta rekonstrukcije krova Osnovne škole "Saburina", od strane ove pobratimske općine. Dogovorena je donacija u iznosu od 50.000 KM, dok će toliki iznos izdvojiti i Općina Stari Grad kako bi učenicima ove škole konačno bili osigurani normalni uslovi za rad i boravak.

U sklopu posjete delegacija Općine Stari Grad učestvovala je u "Šetnji za mir", koju je organizovala ova turska Općina. Nekoliko stotina građana Silivrija obučeni u bijelo, predvođeni načelnikom Isiklarom, učestvovali su u "Šetnji za mir", koja je organizovana povodom sve učestalijih terorističkih napada u Turskoj, ali i u cijelom svijetu. Na centralnom trgu u Silivriju, građanima se obratio načelnik Isiklar, koji je pozdravio načelnika Ibrahima Hadžibajrića, predstavio ga građanima i zahvalio mu se na posjeti. Nakon toga, učesnici su degustirali tradicionalni jogurt po kojem je poznata ova Općina, te posjetili izložbu slika i fotografija lokalnih umjetnika.

Na samom kraju posjete, načelnik Isiklar je poveo delegaciju Starog Grada u obilazak jedne od najuspješnijih kompanija u Silivriju, fabrici "4Hands", vlasnika Huseyina Yelkencija, koja se bavi proizvodnjom i izvozom modernih muških odijela i košulja. Kako je pojasnio Isiklar, fabrika zapošljava 700 radnika i proizvodi muška odijela koja se izvoze u brojne zemlje Evrope: Italiju, Njemačku, Francusku, Veliku Britaniju.



Sa "Šetnje za mir"



Na Brusuljama obnovljen izvor star preko 100 godina



Saniran izvor na Brusuljama

Na Brusuljama, u starogradskoj mjesnoj zajednici Moščanica, saniran je lokalni izvor sa česmama, sagrađen još u austro-ugarskom periodu, kada je tadašnja vlast gradila saobraćajnicu. Izvor je za stanovnike ovog naselja uvijek imao veliki značaj, naročito u vrijeme agresije na našu zemlju, ali je usljed korištenja i neodržavanja bio skoro potpuno uništen. Općina je pristupila kompletnoj sanaciji rezervoara, postavljanju novih cijevi, kaptazi i oblaganju zida.

Voda sa ovog izvora stanovnicima danas uglavnom služi za navodnjavanje i za stoku, ali i za osvježenje brojnim šetačima u ljetnom periodu.

„Na ovoj lokaciji smo izgradili novi rezervoar (kaptazu) i ucijevili vodu na pravilan način, te sanirali kameni potporni zid oko izvora“, pojasnili su u Odsjeku za komunalne poslove.

Za ove radove iz općinskog budžeta izdvojeno je oko 10.000 maraka, a izvođač je bila firma „Set-invest“ iz Sarajeva.

Obnovljena česma na Tereziji



Sanirana česma na Tereziji

Sanirana je javna česma na Tereziji, u starogradskoj mjesnoj zajednici Toka-Džeka. Ova česma Sarajlijama je bila od izuzetno velikog značaja tokom agresije na našu zemlju, i kako mnogi tvrde bila je „žila kucavica“ koja je vodom snabdijevala cijeli Bistrik, pa i šire. Važno je naglasiti da česma na Terezijama nije na javnoj gradskoj vodovodnoj mreži već se radi o prirodnom izvoru koji nikada nije presušio.

Obnovu javne česme finansirala je mještanka Aldijana Husić-Beširević u znak sjećanja na svoju rahmetli majku.

Urađeno je preslaganje kamenog zida koji se nalazi iznad česme, te ucijevljenje vode iznad zida. Na ulazu prema česmi izgrađene su manje stepenice, napravljeno kameno korito. Vrijednost radova je oko 5.000 KM.

Nova gradnja



Gradi se zgrada za socijalno stanovanje

Na području mjesne zajednice Logavina, u ulici Čadordžina, gradi se objekat socijalnog stanovanja za građane Starog Grada.

Pomoćnica načelnika za imovinsko-pravne poslove, katastar i stambene poslove Lejla Cerić, pojasnila je da će u izgradnji zgrade Općina učestvovati sa 100.000 KM, te da je Općina osigurala lokaciju, izradila projektnu dokumentaciju i obezbijedila infrastrukturu. „Ti stanovi bit će izgrađeni za različite integrisane kategorije koje su u socijalnoj potrebi. O tome koje će porodice tu živjeti odlučivat će Komisija“, istakla je Cerić. Pojasnila je da nijedna porodica neće moći dobiti stanarsko pravo jer su stanovi predviđeni za porodice dok su u stanju socijalne potrebe. „Stanovi će se davati u zakup po minimalnim cijenama. Građani će ih moći koristiti samo dok su u stanju socijalne potrebe“, istakla je Cerić.

Zgrada će imati sedam stanova

Izgradnja stanova za socijalno stanovanje u Starom Gradu je dio projekta kojeg realizuje Humanitarna organizacija Hilfswerk Austria, a sredstva u iznosu od 400.000 KM osigurala je Evropska unija.

Završeno je zidanje objekta, a tre-

nutno je u toku postavljanje krovne konstrukcije. Zgrada će imati sedam stambenih jedinica, a stanovi su predviđeni za različite integrisane kategorije koje su u socijalnoj potrebi. Prema riječima Šerifa Glavića, poslovođe firme „Visak“d.o.o. iz Mostara, koja je izvođač radova, poštuje se dinamika radova. „Očekujemo da rok od četiri mjeseca za završetak radova bude ispoštovan,“ kazao je Glavić. „Mi ćemo završiti i unutarne i vanjske radove, dakle kompletnu zgradu i predati investitoru ključ u ruke,“ dodao je Glavić.



Pregradni zidovi



Stari Grad će dobiti najmanje 100 novih klupa

Najmanje stotinu novih klupa bit će postavljeno na brojnim lokacijama u općini Stari Grad. Moderne i višenamjenske parkovske klupe, Starom Gradu je donirala je turska kompanija "Ben" d.o.o., a bit će postavljene na Trgu oslobođenja-Alija Izetbegović, na putu za Barice, u Aleji ambasadora, duž Obale Isa bega Ishakovića, u Mustaj-pašinom mejdanu i na drugim lokacijama gdje se ukaže potreba. O lokacijama za postavljanje novih klupa Služba za komunalne

i inspekcijske poslove konsultovala se sa Sektorom za poslove mjesnih zajednica, tako da će se nove klupe naći na mjestima gdje su to građani tražili. Sve klupe će biti obojene u zelenu boju, inače boju općinskog grba. Njima će se oplemeniti prostor za odmor i rekreaciju i omogućiti građanima da više vremena provode na zelenim površinama, te mjestima za šetnju i odmor. Na svim klupama s bočne strane bit će istaknut logo Općine Stari Grad Sarajevo.



Trg oslobođenja - Alija Izetbegović

Ravnanje i tamponiranje ulice Popov gaj

Radovi sanacije starogradske ulice Popov gaj, na Jarčedolima, napreduju i u toku je tamponiranje podloge.

Ulica će biti rekonstruisana u dužini od oko 355 metara i širini od četiri i po do pet metara

"U toku je ravnanje i tamponiranje terena, te postavljanje šahtova na odgovarajuću visinu", pojasnili su u Službi za komunalne i inspekcijske poslove.

Izvođač radova je firma KJKP „Rad“, a projekat sa oko 100.900 maraka finansira Općina Stari Grad.



Popov gaj: Radovi u toku

Izgradnja još jednog potpornog zida

U toku je izgradnja armirano-betonskog potpornog zida na području Mjesne zajednice Moščanica, u ulici Obhodža bb (u blizini mosta Bosansko-turskog prijateljstva).

Bit će izgrađen novi potporni zid u dužini od 30 metara i prosječnoj visini od dva i po metra, a sve u cilju sprečavanja daljeg obrušavanja terena.

Sanaciju zida sa oko 17.000 KM finansira Općina Stari Grad, a izvođač radova je firma "Sela" iz Sarajeva.



Bit će izgrađen zid dužine 30 metara

Sanirana ograda na igralištu Iza gaja



Igralište Iza gaja ponovo u funkciji

Zaštitne mreže postavljene oko novoizgrađenog igrališta Iza gaja, koje su nepoznati počinioci devastirali početkom ljeta, zamijenjene su novim. Zamijenjeno je ukupno 13 velikih i jedan mali panel. Šteta je sanirana, a igralište je ponovo u funkciji za sve građane. Podsjećamo, na sportskom igralištu Iza gaja, u Mjesnoj zajednici Hrid-Jarčedoli, sredinom juna su nepoznati počinioci nanijeli štetu. Pokidane su mreže iznad ulaznih vrata, te sa obje strane ulaza. Sportsko igralište Iza gaja izgrađeno je 2014. godine, po evropskim standardima, dimenzija 20x40 metara. Općina Stari Grad je izdvojila oko 150.000 KM za gradnju igrališta, asfaltiranje, postavljanje zaštitne ograde i mreža, te izgradnju potpornog zida i pristupnog puta.

Saniran most na brani Bentbaša



Novе daske na mostu

Most koji se nalazi u neposrednoj blizini brane Bentbaša, saniran je i osposobljen za korištenje.

Gazište mosta bilo je dosta oštećeno i većina postojećih daski bila je polomljena pa je postojala opasnost ozljeđivanja prolaznika.

Radove na sanaciji mosta izvodili su uposlenici Sektora za tehničke poslove Općine Stari Grad. Krajem augusta, radnici su mijenjali daske na drvenom gazištu mosta.

"Zamijenjenje su daske na dužini od 22 metra, širine dva metra," pojasnili su iz Sektora.

Projekti

IZGRADNJA I SANACIJA POTPORNIH ZIDOVA

Kaskadni zid u Bistričkom potoku

U Bistričkom potoku izgrađen je novi potporni kaskadni zid, te saniran postojeći stari kameni zid. U okviru preventivnih mjera zaštite, urađen je projekat izgradnje armirano-betonskog potpornog kaskadnog zida, san-

acija postojećeg kamenog, te pravilno kanaliziranje vode na početku Bistričkog potoka na Boguševcu, saopćili su iz Službe za civilnu zaštitu Općine.

„Pored izgradnje kaskadnog zida i sanacije postojećeg kamenog, uradili smo sanaciju zida na još nekoliko mjesta ispod mosta, također na Boguševcu“, pojasnili su iz Službe.

Ove radove izvodila je firma „Klico-trans gradnja“ iz Sarajeva.



Bistrički potok



Pogledine

Zid na Pogledinama

Na mjestu starog i dotrajalog potpornog zida u ulici Pogledine kod broja 12, (MZ Hrid-Jarčedoli) izgrađen je novi, dužine 25 metara. U ovoj ulici, na skretanju koje se nalazi između nekoliko kuća u

naselju, postojao je stari zid, koji je s godinama urušen, te je često dolazilo do obrušavanja tla. Stari je srušen, a izgrađen novi, betonski zid, koji je Općina finansirala sa 7.000 KM. Radove je izvodila firma „Klico trans gradnja“ iz Sarajeva.

Saniran zid na obali Miljacke

Saniran je kameni obalni zid Miljacke u blizini mosta, kod Careve džamije.

„Tokom sanacije se vodilo računa o autentičnosti zida, s obzirom da se nalazi na obali Miljacke, tako da je građen

od istog kamena. Sanirano je oko šest metara zida, visine jednog metra“, pojasnili su iz Službe za civilnu zaštitu Općine. Za sanaciju zida izdvojeno je oko 1.000 KM, a radove je izvodila firma „Balkan-kamen“ iz Sarajeva. Projekat sanacije potpornog zida finansirala je Općina Stari Grad, a vrijednost investicije je bila oko 1.000 KM.



Zid na obali Miljacke



Mošćanica prvi dio



Mošćanica drugi dio

Dva nova zida na Mošćanici

Na Mošćanici su izgrađena dva nova armirano-betonska potporna zida, u naselju Gazin Han. Zidovi su izgrađeni zbog opasnosti od obrušavanja tla, te ugrožavanja sigurnosti građana. Oba zida duga su po 30 metara, a izgrađena su uz saobraćajnicu na Darivi, nedaleko od mosta „Bosansko-turskog prijateljstva“ na Obhodži. Prvi zid gradila je firma „Sela“, a drugi firma „Debos“ iz Sarajeva. Obje investicije koštale su oko 53.000 KM, a finansirala ih je Općina Stari Grad Sarajevo.

Ogradni zid u Potoklinici

Urađena je hitna sanacija betonskog ogradnog zida u ulici Potoklinica, čije je oštećenje nastalo potkopavanjem korijena drveća koje se nalazilo u blizini. „Uradili smo hitnu sanaciju postojećeg

ogradnog zida uz kaldrmisano stepenište, te posijekli drvo koje je uzrokovalo oštećenje“, pojasnili su u Odsjeku za komunalne poslove Općine. Izvođač radova je bila firma „Balkan kamen“ iz Sarajeva, a sanaciju je u iznosu od oko 900 KM finansirala Općina.



Potoklinica

Asfaltiranje starogradskih ulica: Više od 1.200 metara novog asfalta

Na području općine Stari Grad u toku ljetnih mjeseci asfaltirano je i sanirano dvanaest ulica, a ukupna dužina svih asfaltiranih ulica prelazi 1.200 metara. Za ove radove Općina je izdvojila oko 300.000 KM, a izvođač radova je bila firma KJKP „Rad“.

Za Beglukom

U ulici Za Beglukom od broja 1 do broja 11 urađena je sanacija i asfaltiranje u dužini od oko 100 metara i prosječnoj širini od osam i po do deset metara. Ovaj projekat sa oko 24.000 KM finansirala je Općina Stari Grad.



Za Beglukom



Vratnik Mejdan

Vratnik Mejdan

Sanirana je i ulica Vratnik Mejdan, od kule do broja 5. Ulica je se asfaltirana u dužini od 60 metara i prosječnoj širini od sedam i po do osam i po metara. Radovi su koštali oko 17.400 maraka.

Potoklinica
AbadžilukSafvet-bega Bašagića
Safvet-bega Bašagića,
Alije Nametka i Mihrivode

Potoklinica

Novi asfalt u ulici Potoklinica postavljen je u dužini oko 160 metara i prosječnoj širini oko pet metara. Za ovaj projekat Općina Stari Grad je obezbijedila 34.800 KM.

Sedrenik od broja 139 do 145

Na Sedreniku od broj 139 do broja 145 urađena je sanacija ulice u dužini od oko 77 metara i prosječnoj širini od tri i po do četiri i po metra. Vrijednost investicije je bila oko 14.000 KM.

Ulica Abadžiluk asfaltirana je u dužini od oko 81 metar i širini od pet do šest i po metara. U sklopu ovog projekta uklonjen je stari i oštećeni asfalt i postavljen novi. Ovaj projekat je koštao oko 26.000 KM.

Urađena je rekonstrukcija dijelova ulica Safvet-bega Bašagića, Alije Nametka i Mihrivode do broja 59. Ulice su asfaltirane u ukupnoj dužini od 270 metara i prosječnoj širini od pet do osam metara. Za ove radove izdvojeno je oko 84.000 KM.

Adžemovića

Asfaltiran je ulica Adžemovića u dužini od 215 metara i širini od tri do četiri i po metra. Sanacija je podrazumijevala uklanjanje dotrajalog asfalta, izdizanje šahtova, šibera i rešetki na potrebnu visinu, te asfaltiranje ulice. Sanaciju ulice Općina je finansirala sa oko 12.100 KM.

Mihrivode

Postavljeno je 85 metara novog asfalta u ulici Mihrivode od broja 59 do ulice Vrbanjuša. Ova ulica nalazi se u Mjesnoj zajednici Medrese, a njena sanacija koštala je oko 35.800 maraka.

Ablakovina

Saniran je i asfaltiran makadamski dio ulice Ablakovina od broja 4 do 10. Asfalt je postavljen u dužini od 85 metara. Radovi su koštali 12.600 KM.



Sedrenik od broja 139 do 145



Abadžiluk



Ablakovina



Adžemovića



Mihrivode



Faletići

Bajramske hedije za 350 porodica

Općina je i ove godine organizovala tradicionalna bajramska druženja sa članovima porodica šehida i poginulih boraca, nezaposlenim ratnim vojnim invalidima i demobilisanim borcima, tokom kojih su im uručene novčane hedije.



Sa podjele hedija za ramazanski Bajram

Druženje i novčane hedije za 350 pripadnika boračke populacije organizovano je u povodu ramazanskog i kurban Bajrama. Novčane hedije po 100 KM dobilo je 200 porodica šehida i poginulih boraca, 100 nezaposlenih ratnih vojnih invalida i 50 nezaposlenih demobilisanih boraca.

Na druženjima sa ovom populacijom bio je prisutan i Sakib Avdibegović, pomoćnik načelnika za boračko-invalidsku zaštitu, koji je kazao kako Općina više puta godišnje pomaže ovoj kategoriji stanovništva.



Sa podjele hedija za kurban Bajram

“Za oba Bajrama podijelili smo hedije, oko 35.000 KM. A, na godišnjem nivou za ovu populaciju, Općina izdvoji i preko pola miliona maraka. Ovim kategorijama pomaže se i kroz boračka udruženja, plastenike, stipendije, jednokratne pomoći, te pomoći za liječenje”, kazao je Avdibegović.

Pomoć



Podijeljeno 17 plastenika i 19.000 sadnica

Korisnicima u Starom Gradu, demobilisanim borcima i članovima dvije šehidske porodice, Općina Stari Grad je dodijelila 17 plastenika sa dodatnom opremom, te više od 19.000 komada sadnog materijala. U cilju stimulisanja poljoprivredne proizvodnje u Starom Gradu, te podrške malih domaćinstava i poljoprivrednika koji na ovaj način ostvaruju proizvodnju za vlastite potrebe, ali i za

U plasteniku zasadio rukolu



Nedžad Gušter

Najmlađi korisnik koji je potpisao ugovor je Nedžad Gušter sa Obhodže. “Općina mi je izašla u susret i dodijelila plastenik sa kojim želim da proširim proizvodnju. Ja ću u plasteniku zasaditi samo rukolu. Imam i mini farmu domaćih kokoški. Sve što proizvodim je organsko i to mi je i cilj, samo zdrava hrana.”, ističe je Nedžad.



Potpisani ugovori s korisnicima

prodaju, iz budžeta Općine Stari Grad ove godine izdvojeno oko 73.000 KM.

Ugovore sa korisnicima plastenika su 10. jula, potpisali načelnik Općine Stari Grad Ibrahim Hadžibajrić i vršilac dužnosti pomoćnika načelnika za privredu Senad Resić. “Nadam se da će svi korisno i na pravi način iskoristiti ove plastenike i da će im dobro doći da povećaju kućni budžet. Dobili su sve što im treba za početak, a sada je na njima da dalje rade i prate da ne dođe do neke bolesti i da im propadne urod,” kazao je Hadžibajrić.

Aleja ambasadora

Uređenje Aleje ambasadora



U Aleji ambasadora, od Bentbaše do mosta na Mošćanici, postavljene su nove klupe i korpe za smeće. Ukupno 20 klupa i korpi postavljeno je na ovoj dionici, čime je završeno planirano uređenje ove popularne šetnice. Inače, na kompletnom lokalitetu Aleje ambasadora urađeno je sezonsko vegetativno održavanje lipa, njih ukupno 149, okopavanje i prihranjivanje, zavisno od potreba.

Osim toga, u Aleji je pokošena trava i urađeno sakupljanje i odvoz neorganskog otpada, te vegetativno uređenje. Ukupno 43 stabla lipa su zamijenjena novim jer su bila oštećena ili bolesna, te se pristupilo revitalizaciji Aleje ambasadora. Urađeno je i njihovo okopavanje i prihranjivanje. Za sve radove je angažovano KJP "Sarajevo-šume" d.o.o. Sarajevo, a ove aktivnosti provedene su putem Službe za privredu.

Aleja ambasadora broji 153. lipu

Na inicijativu Općine Stari Grad Sarajevo, 2002. godine pokrenut je Projekat formiranja aleje lipa pod nazivom "Aleja ambasadora" koja obuhvata prostor šetnicom duž rijeke Miljacke, odnosno prostor od Bentbaše do Kozije ćuprije. Šetnica je čitavom dužinom asfaltirana. Dužina

Aleje je oko 2.800 metara. Od 2002. godine do danas, zasađene su 153. lipu.

Vrste lipa koje su sađene u Aleji su: bijela ili srebrna lipa (*Tilia tomentosa*), velikolisna lipa (*Tilia grandifolia*), sitnolisna lipa (*Tilia parvifolia* i *Tilia cordata*), cvijetna i drugi varijeteti.

Očišćena brana na Mahmutovcu

Brana na Mahmutovcu, u istoimenoj mjesnoj zajednici, početkom ljeta preventivno je očišćena, kako bi spremno dočekala jesen i prve padavine. Brana, koja sprječava oticanje oborinskih voda iz pravca Trebevića na obližnje kuće, očišćena je od korova i šiblja koje je se nakupilo. Uposlenici firme "Klico trans gradnja", koja je izvodila radove, pokosili su travu, posjekli šiblje, nisko rastinje i korov, te očistili površinu iznad brane. Na dijelu ispod brane, a iznad obližnjih kuća, postavljena je ograda. Očišćeno je i sportsko igralište koje se nalazi iznad brane, te slivna rešetka predividena za oticanje oborinskih voda.



Uređena brana na Mahmutovcu

Čišćenje brane urađeno je preventivno, kako eventualne padavine ne bi dovele do poplava. Projekat je realizovala Služba zaštite Općine Stari Grad, a vrijednost investicije bila je oko 6.000 KM.

Ambasadori Kuvajta, Libije i Saudijske Arabije zasadili lipu



Diana Salihbegović sa ambasadorom Kuvajta (slika 1), ambasadorom Libije (slika 2) i ambasadorom Saudijske Arabije (slika 3)

U Aleji ambasadora početkom septembra zasađene su još tri lipu, a zasadili su ih n.j.e. Nasser Riden Thamer Almotairi, ambasador Države Kuvajt u BiH, n.j.e. Hani Abdullah M. Mominah, ambasador Kraljevine Saudijske Arabije u BiH, i n.j.e. Arebi S.A.Halloudi, ambasador Države Libije u BiH. Time je broj sadnica u ovoj šetnici porastao na 153.

Ambasadore su u Aleji, u ime načelnika Ibrahima Hadžibajrića, dočekali Diana Salihbegović, sekretar organa državne službe i Slobodan Nikolić, savjetnik načelnika. Salihbegović je ambasadore pozdravila u ime načelnika i kazala da joj je drago što je baš njoj pripala čast da sadi lipu sa trojicom ambasadora. "Ovo je samo jedan mali doprinos lokalne zajednice uspostavljanju i nastavku dobrih odnosa sa ovim zemljama. Ovo je istovremeno i pozivnica ambasadorima da se i po isteku mandata vrate u Stari Grad i uvijek su dobrodošli," kazala je Salihbegović. U ime ambasadora obratio se n.j.e. Nasser Riden Thamer Almotairi, ambasador Kuvajta, koji je kazao da današnji čin sadnje simbolizira i predstavlja dubinu odnosa između njihovih zemalja i BiH.

"Mi smo svi jako posvećeni u unapređenju uzajamnih veza na svim poljima. Koristim priliku da pozovem načelnika Općine Stari Grad i njegove saradnike da posjete naše zemlje," kazao je Almotairi.

Postavljeni rukohvati na Kovačima



Ograda duga 28 metara

Postavljena je rukohvatna ograda na lijevoj strani ulice Kovači, od broja 5 do broja 29. Općina je odlučila postaviti ogradu na inicijativu vlasnika i zakupaca obližnjih poslovnih prostora, s obzirom da su ispred njihovih radnji često bila parkirala vozila, čime je bio onemogućen prilaz radnjama. „Da bi spriječili nepropisno parkiranje automobila, Općina je odlučila postaviti ogradu dužine 28 metara. Postavljeni su klasični rukohvati od crnih cijevi zaštićenih bojom“, pojasnili su u Odsjeku za komunalne poslove Općine.

Za ove radove iz budžeta Općine izdvojeno je oko 2.000 maraka, a radove je izvodila firma „Fadž company“ iz Sarajeva.

Sanirano stepenište u ulici Potoklinica



Popravljen gazišta

U ulici Potoklinica urađena je djelimična sanacija i popravka betonskog stepeništa. „Dio stepeništa u Potoklinici je bio u lošem stanju, te smo pristupili sanaciji pješačke dionice“, pojasnili su u Odsjeku za investicije Općine. U sklopu radova sanirano je 27 gazišta. Urađeno je preslaganje kamenih ivičnjaka i gazišta, betoniranje dijela između ivičnjaka i potpornog zida koji se nalazi pored stepenica, te izdizanje gusanih šaftova. Izvođač radova je bila firma „Balkan-kamen“ iz Sarajeva, a vrijednost investicije, koju je finansirala Općina, iznosila je oko 4.500 KM.

Projekti

Uspostavljena javna rasvjeta na Hladivodama

Nakon više od godinu dana, stanovnici ulice Hladivode ponovo su dobili uličnu rasvjetu, koju nisu imali zbog problema izmještanja opreme, tačnije razvodne kutije sa koje se ulična rasvjeta napaja. S obzirom da se pomenuta oprema nalazila na privatnom posjedu, vlasnik nije dozvoljavao njeno korištenje, niti izmještanje, te je na kraju pokrenut sudski postupak. Nakon sudske presude, konačno je postignut dogovor te je, na veliko zadovoljstvo mještana Hladivoda, urađeno izmještanje i rasvjeta ponovo funkcioniše. Jedna od mještanki ulice Hladivode kazala je kako su presretni zbog konačno riješenog spora. „Na tom dijelu živi stotinjak građana i svi smo

imali veliki problem, pogotovo zbog djece jer je noću u ulici bio potpuni mrak. Ali, najvažnije je da je to iza nas i da ponovo imamo rasvjetu“, kazala je ona. Za pomenute radove izdvojeno je oko 2.600 maraka.



Ponovo uspostavljena rasvjeta

Uklonjen ruševni objekat u Prijekoj česmi

Ruševni stambeni objekat, koji se nalazio u ulici Prijeka česma 22 na Vratniku, uklonjen je jer je predstavljao opasnost po živote ljudi i njihovu imovinu. „Iako je stara kuća u naselju Vratnik u privatnom vlasništvu, Općina je pristupila uklanjanju jer je predstavljala opasnost za ljude koji žive u okolnim objektima, ali i za prolaznike“, pojasnili su u Službi za investicije, komunalne u inspeksijske poslove koja je i pokrenula proceduru uklanjanja objekta. Angažovana je firma „Hise A&A“ koji su uklonili objekat i odvezli ruševni materijal na gradsku deponiju.

Uklanjanje objekata koštalo je oko 3.600 KM, a finansijer radova je bila Općina Stari Grad Sarajevo.



Uklonjena opasnost na Vratniku

Uređenje puta Barice – Gornje Biosko



Uređen put dužine 3,5 kilometra

Stari putni pravac, koji povezuje Barice i Donje Biosko, a jednim dijelom se nalazi na Sedreniku, a drugim na Moščanici, uređen je i vraćen u funkciju. Prema in-

formacijama iz Službe za komunalne i inspeksijske poslove Općine Stari Grad, uređen je stari put koji povezuje Barice sa Donjim Bioskom dužine 3,5 kilometra. Izvršeno je mašinsko čišćenje, ravnanje i uređenje staze duge 3,5 kilometra. „S obzirom da se staza nalazi na nadmorskoj visini od oko 920 metara idealna je za rekreativce i planinare. Uređenjem ove dionice povezali smo put sa Barica na Sedreniku i Donjeg Bioska na Moščanici“, pojasnili su u Službi. Uređenje puta sa oko 5.900 KM finansirala je Općina, a radova je izvela firma „ADE 5“ iz Sarajeva.

Sporazum o sufinansiranju projekata iz budžeta Kantona Sarajevo

Ministar komunalne privrede i infrastrukture Kantona Sarajevo Senad Hasanspahić i načelnik Općine Stari Grad Ibrahim Hadžibajrić potpisali 03. augusta Sporazum o sufinansiranju projekata iz budžeta KS za 2015. godinu od namjenskih sredstava – vodne naknade. Potpisani sporazum predviđa sufinansiranje druge faze radova rekonstrukcije ulice Strošići, u iznosu od 200.000 KM. Prva faza rekonstrukcije ulice na Vratniku je u završnoj fazi, a zahvaljujući sredstvima koje će obezbijediti Ministarstvo komunalne privrede i infrastrukture, bit će realizovana i druga faza rekonstrukcije na koju se čekalo više od 70 godina.



Načelnik Hadžibajrić i ministar Hasanspahić potpisali Sporazum

I Općina Kepez želi investirati u Stari Grad

Delegacija Unije mediteranskih općina iz Republike Turske, predvođena predsjednikom Hakanom Tutuncu, posjetila je Općinu Stari Grad gdje ih je primio načelnik Ibrahim Hadžibajrić. Hakan Tutuncu načelnik je Općine Kepez u Antaliji sa kojom je Općina Stari Grad potpisala Sporazum o bratimljenju još 2009. godine, što je bio razlog više za posjetu. U desetočlanoj delegaciji bili su i načelnici turskih općina Burdur, Kumrudža i Kečibornu. Načelnik Tutuncu je izrazio žaljenje što saradnja sa Općinom Stari Grad pre-



Načelnik Hadžibajrić sa delegacijom iz Turske

thodnih godina nije bila na još višem nivou i obećao da će se to promijeniti. Tokom susreta razgovaralo se o razvoju Starog Grada u prethodnim godinama i brojnim investiranjima iz Republike Turske. Načelnik Tutuncu izrazio je spremnost za sufinansiranje projekata sanacije škola, te najavio da će odmah po povratku u Kepez razmotriti tu mogućnost sa svojim saradnicima. "Razmotrit ćemo da iz naših budžetskih sredstava koja su namijenjena za podršku pobratimskim općinama finansiramo obnovu škola ili džamija u Starom Gradu," kazao je Tutuncu.

Uklonjene tende i ljetne bašte u četiri ulice

U ulicama Štrosmajerova, Trg fra Grge Martića, Zelenih beretki i Muvekitina 15. septembra, 2015. godine uklonjene su sve ljetne bašte čijim su vlasnicima uručena rješenja o prestanku prava na privremeno korištenje javnih površina u svrhu postavljanja ljetnih bašti jer se nisu pridržavali odredbi navedenih u rješenjima i koristili su površinu izvan utvrđenih gabarita. Uposlenici Službe za komunalne i inspeksijske poslove, uz podršku nadležnih policijskih organa i tehničku podršku KJKP "Rad", na dan isteka roka, uklonili su samo jednu ljetnu baštu u ulici Štrosmajerova, dok su ostale uklonili vlasnici.

Osim toga, investitori su uklonili svih 16 čeličnih konstrukcija sklopivo-rasklopivih tendi na fasadama zgrada i na ulicama čije je uklanjanje naloženo ranije izda-

tim rješenjima, sa rokom do 15. septembra. Općina Stari Grad Sarajevo je, putem Službe za komunalne i inspeksijske poslove, u augustu, 2015. godine, izdala



Ulica Štrosmajerova

rješenja o prestanku prava na privremeno korištenje javnih površina u svrhu postavljanja ljetnih bašti korisnicima koji se nisu pridržavali odredbi navedenih u rješenjima i koristili su površinu izvan utvrđenih gabarita. Također, Općina je izdala rješenja kojim je naredeno investitorima da demontiraju i skinu čeličnu konstrukciju sklopivo-rasklopivih tendi na fasadama zgrada i na ulicama i da vrate površine/ulice u prvobitno stanje. Korisnicima kojima je rješenje o korištenju javnih površina isteklo zaključno sa 31. augustom, upućeno je obavještenje da su dužni ukloniti sadržaj (ugostiteljski inventar i suncobrane) sa javne površine i vratiti je u prvobitno stanje. Akcija kontrole korištenja javnih površina u Starom Gradu bit će nastavljena i u narednom periodu.

Energetski Dani Sarajevo 2015: Prezentacija pasivne kuće



Učesnicima predstavljena "Pasivna kuća"

Na međunarodnoj konferenciji "Energetska efikasnost i lokalna zajednica" održanoj u okviru manifestacije "Energetski Dani Sarajevo 2015", Općina Stari Grad Sarajevo i firma "Promo" iz Donjeg Vakufa predstavili su zajednički projekat - pasivnu kuću. Na konferenciji su učestvovali Aida Veladžić, stručni savjetnik za investicione poslove u Općini Stari Grad i Eldin Čolak, tehnički direktor firme "Promo" iz Donjeg Vakufa. Tokom panel diskusije predstavljena je prva pasivna kuća sagrađena u Starom Gradu, koja svojom vrhunskom toplotnom izolacijom i korištenjem energije iz obnovljivih izvora znatno smanjuje potrošnju energije.



Eldin Čolak, tehnički direktor

Pasivna kuća je sagrađena prošle godine, u saradnji Općine Stari Grad i firme "Promo", u naselju Kovači. Posjeta Pasivnoj kući upriličena je 17. septembra, a brojne zainteresovane sa kućom je upoznao Eldin Čolak. Istakao je da je godišnja potrebna toplota za grijanje ove kuće 14kWh/m², a godišnja potrošnja primarne energije 103 kWh/m². Tematska načela pasivne kuće su očuvanje energije, minimiziranje gubitaka i maksimiziranje dobitaka. Cijena kuće je 1.519 KM po m², a kuća troši do 20 puta manje od prosječne kuće u Bosni i Hercegovini.

Obrazovanje



Općina izdvojila 10.000 KM za rekonstrukciju vrtića "Pčelica"

Za nastavak radova na rekonstrukciji vrtića "Pčelica", na Kovačima, Općina Stari Grad izdvojila je 10.000 KM. Sporazum o sufinansiranju radova potpisali su u augustu načelnik Općine Stari Grad Ibrahim Hadžibajrić i v.d. direktora JU "Djeca Sarajeva" Jasmina Čongo.

Načelnik Hadžibajrić je podsjetio da ovo nije prva donacija vrtiću "Pčelica" i da je Općina Stari Grad prošle godine izdvojila 20.000 KM za sufinansiranje sanacije krova. "Kada smo izdvojili sredstva za rekonstrukciju krova, obećao sam da ćemo pokušati osigurati još sredstava, iako vrtići nisu u nadležnosti lokalne zajednice. Ova sredstva će biti utrošena na sanaciju gorn-

jeg sprata vrtića i zaista se trudimo koliko god možemo da naša djeca imaju što bolje uslove smještaja," kazao je Hadžibajrić. Direktorica Čongo je pojasnila da vrtić "Pčelica" pohađa oko 60-oro djece u dvije odgojne grupe. Sam vrtić bio je u vrlo lošem stanju i neuslovan za korištenje, no nakon sanacije krovne konstrukcije prošle godine, sada je rad u njemu olakšan. "Ovim sredstvima radit će se sanacija grijanja, podova, molerski radovi i sve što se bude moglo uraditi na gornjem spratu. Plan nam je da otvorimo mogućnost za prijem još dvije odgojne grupe, uzrasta od šest mjeseci do tri godine," pojasnila je Čongo.

Novi sanitarni čvorovi u školi na Vratniku

U Osnovnoj školi „Hamdija Kreševljaković“ na Vratniku izvršena je rekonstrukcija sanitarnih čvorova. Iz Odsjeka za investicije Općine saopćili su da je urađena kompletna rekonstrukcija svih sanitarnih čvorova na tri etaže škole. „Radovi su završeni prije početka školske godine, tako da učenici od septembra imaju puno bolje higijenske uslove, nego ranije. Urađena je kompletna rekonstrukcija 14 kabina toaleta sa predulazima,“ pojasnili su u Odsjeku.

Općina je odlučila finansirati ovaj projekt u cilju omogućavanja boljih higijenskih uslova za učenike i uposlenike ove škole, s obzirom da su toaleti bili neuslovn i neadekvatni.

U sklopu projektnih radova urađeni su demontaža i rušenje, izolaterski, vodovodni, kanalizacioni, keramički,



Sanirano 14 kabina toaleta

zidarski, molersko-farbarski, rigips i stolarski radovi. Postavljena je sanitarna galanterija kao što su wc školjke, čučavci, umivaonici sa česnama i drugo. Za ovaj projekat Općina Stari Grad iz budžeta je izdvojila oko 30.000 KM. Izvođač radova je bila građevinska firma „Sod – KM“.

Počela BH Telecom fudbalska liga



BH Telecom fudbalska liga osnovnih škola Starog Grada, sezona 2015/2016. počela je 17. septembra, 2015. godine utakmicom između selekcija "Saburina" i "Šejh Muhamed efendija Hadžijamaković".

Novina u odnosu na prošlu sezonu je što svaku utakmicu BH Telecom fudbalske lige osnovaca Starog Grada prate skauti koji pomno promatraju igru mladih fudbalera. Gost utakmica prvog kola bio je Emir Karahmet, rukovodilac Škole fudbala „Asim Ferhatović Hase“.

„Utakmicama prvog kola prisustvovao je Emir Karahmet, a nadamo se da će među našim osnovcima biti neki novi Sušić ili Džeko“, kazao je Mehmed Janjoš-Čala, komesar Lige, inače nekadašnji igrač i trener FK "Sarajevo". Janjoš se osvrnuo i na prošlogodišnju Ligu kazavši da su prezadovoljni načinom na koji se sve odvi-

jalo, te istakao da se nada uspjehu i ove godine.

„Mi pokušavamo da naučimo djecu na fer igru, da se druže i da poštuju nekog drugog, mimo toga što im je cilj pobjeda. Želja nam je da promoviramo sport, drugarstvo i da djeca pokažu što znaju,“ kazao je popularni Čala.

Odigrana dva kola

Na tabeli nakon odigranog drugog kola po šest bodova imaju selekcije osnovnih škola "Šejh Muhamed ef. Hadžijamaković", Edhem Mulabdić" i "Vrhbosna". Bez bodova su ekipe škola "Mula Mustafa Bašeskija", "Saburina" i "Hamdija Kreševljaković".

Utakmice se igraju četvrtkom, na terenima Centra za mali nogomet na Bentbaši.

Općina podržala drugu Ljetnu školu studenata ELSA BiH

Druga Ljetna škola prava koju organizuje Evropsko udruženje studenata prava u BiH održana je krajem jula, 2015. godine u Sarajevu. Općina je podržala i ove godine ljetnu školu, a saradnja je formalizirana potpisivanjem Memoranduma o saradnji. Ovo je već drugi put kako Općina pruža tehničku i finansijsku podršku ovom projektu.

Ljetnu školu na temu „Medijsko pravo i uloga medija u oružanim sukobima“ su vodili predavači iz cijele Evrope i Bosne i Hercegovne.

„Tema nije slučajna. Željeli smo da upravo ovdje, u Sarajevu, 20 godina na-

kon rata govorimo o važnosti medija u oružanim sukobima, o tome kako su novinari izvještavali iz ratnog Sarajeva prije 20 godina“, istakao je Mirza Hebib, predsjednik ovog udruženja u BiH.



Sa potpisivanja Memoranduma o saradnji

Stari Grad na 4. Generalnoj skupštini Unije turskih općina



Diana Salihbegović sa učesnicima Generalne skupštine

Općina Stari Grad učestvovala je na 4. Generalnoj skupštini Unije turskih općina, održanoj 09. septembra, 2015. godine u Istanbulu. Skupštini su prisustvovali brojni načelnici i predstavnici turskih općina, ali i općina drugih zemalja koje su u članstvu Unije. Općinu Stari Grad predstavljala je Diana Salihbegović, sekretar organa državne službe.

Iz Bosne i Hercegovine Skupštini su prisustvovali i načelnici Općina Novi Grad Sarajevo, Konjic, Doboj i Doboj-jug, kao i bh konzul u Istanbulu Adi Durmić. Tokom zasjedanja izabrani su članovi Upravnog odbora Unije turskih općina.

Općina Stari Grad Sarajevo je na sjednici Izvršnog odbora Unije turskih općina, održanoj 28. januara, 2015. godine, primljena u članstvo ove međunarodne organizacije. U sastavu ove Unije je 1.090 općina iz zemalja kao što su Bugarska, Albanija, Crna Gora, Srbija, Ukrajina...

Biciklistički maraton prošao kroz Stari Grad

Učesnici XII tradicionalnog tandem biciklističkog maratona "Kragujevac-Mostar 2015" dočekani su 24. jula u Starom Gradu. Biciklistički maraton krenuo je iz Kragujevca 22. jula, a tradicionalno su se, na putu do Mostara, zaustavili i u Starom Gradu.

Načelnik Hadžibajrić je podsjetio da su Općina Stari Grad i Kragujevac vezani pobratimskim odnosima već tri godine i da svake godine Stari Grad ugosti učesnike maratona. Za podršku koju pruža ovom projektu Hadžibajrić je uručena i plaketa za izuzetan doprinos afirmaciji sportskih, kreativnih i intelektualnih potencijala osoba oštećenog vida i očuvanju tradicije ove manifestacije, kao i knjiga "Pogled", autora Jovana Pavlovića-Bojadžića. Prenoseći svoje impresije sa puta koji su prešli od Kragujevca do Sarajeva, Goran Nikolić, generalni sekretar Paraolimpijske akademije "Junior", kazao je da ovaj maraton voze srećem i da im ništa nije teško.

Stavo Sarajevu

Piše: **Rajko Crnogorac**



O autoru:

Rođen juna, 1955. godine na Baščašiji u Sarajevu. Završio OŠ "Saburina". Živi i radi u sjevernoj Americi.

Sokak Non Pasaran - Čuvari Adresa

S nijeg nije bio neuobičajena pojava u mom gradu, oko Sv. Arhangela Mihaila, na Slavu svakog 21. novembra, kada su gosti dolazeći u kuću ostavljali tragove po snijegu i svaki od njih po dio svoje istorije. Ja, kao klinac nekih šezdesetih, sam se puno radovao tragovima, pošto su svi vodili ka mojoj kući i bio sam nekako važan, sam za sebe naravno, dok sam malom metlicom skidao snijeg sa "krombi" kaputa i šešira ljudi koji su hodili unutra. Brižljivo sam slagao teške kapute i šešire na ofinger okačen o zid teškim kukastim ekserima sačekivajući goste da izađu, poneki tutnuvši mi u dlan po koji dinar milujući me po glavi zamanknuvši niz sokak. Rođaci iz Osjeka sarajevskog koji su bili naši višednevni gosti tih dana su donosili dobru rakiju šljivu i suho meso i sa pokojnim ocem išli u Staru Crkvu na Baščašiji, a kasnije na po jednu u čačanski podrum "kod Juke" na uglu Trifka Grabeža i Miloša Obilića. Moja prva i draga komšinicica često je sjedila na svom minderluku pored prozora i zureći kroz njega i svoju prošlost vintala bi brojanicu u svojoj ruci dok bi mi odmahnila na moje mahanje kao znak da sam je vidio i pozdravio. Bila je fina mala ženica, nikada udata, stara Sarajka o kojoj je moja majka imala samo riječi hvale, kako za nju tako i za njenu majku i brata koji više nisu bili među živima...

Veliki kovani ključ njenih sokačnih vrata je visio na našem zidu, a naš ključ na njenom. Po pričanju majčinom tako je ostalo od vijkada i postalo navika. Radila je prvo na čarsiji, a kasnije kod Vijećnice, u trafici prodavala cigare i novine i kasnije mi davala filter Beograd na komad, kao njen poklon kad sam se propušio. Galamila je kad sam iskakao pozadi iz tramvaja zakačen za njega dok je kroz mali prozor trafike smotavala Politiku koju sam trebao nositi kući ocu. "Svrataćeš jarabi šučur, ugursuze jedan, okami se čorava posla", uvijek je govorila vidjevši kako iskacem sa tramvaja.

Miris dunja na ormaru i čokolade u šifonjeru.

P adanje prvog snijega i naša Slava označavali su ulazak u mirno zimsko doba za staru i starog i zimske radosti za mene i moju raju...Tih dana bi se obično mijenjale dunje na ormaru i majka bi stare smežurane zamjenjivala sa onim svježim zamotanim u novinsku hartiju i redala ih na stari orahov ormar odakle bi se pružao miris dugo u zimskim danima. Pored mirisa dunja u kući je tih dana mirisao tamjan, plamen slavske svijeće bio je uvijek miran kao nacrtan, i nije smio da leluja bez razloga, jer je to, lelujanje, po predanju bio loš znak za narednu godinu. Otac bi često kratio fitilj svijeće makazicama dok je stojeći časkao sa gostima. Moj pristup u gostinjsku sobu nije baš bio dozvoljen, ali sam često tražio pogledom čokolade koje sam dobivao i koje bi majka redala po šifonjerima raspoređujući ih ravnomjerno kad mi zatreba energije...red po red...Čokolade bi poprimile miris sapuna koji su također slagani u ispeglanu posteljinu i lavande ubrane pred kraj ljeta. Molio sam samo Boga da ne odnese čokolade nekom drugom na poklon, jer se znalo često desiti da već dobivene čokolade idu iz ruke u ruku, iz ormara u ormar godinama, pa kad ih neko otvori vidi samo bijeli prah na cokoladi i osjeti miris ustajalosti, što nije smetalo zadnjem srećnom korisniku da je smaže poslije šnite hljeba namazane svinjskom mašću i posute alevom paprikom. Slušao sam priče koje su tekle ležerno, neusiljeno, baš i kao onaj plamen svijeće. Vatra u našoj kaljevoj peći obloženoj plavo-sivim reljefnim pločama, Bog zna kad uzidanoj u zid, je odavala radost i toplotu, a ja sam se brinuo da se vatra ne ugasi i brižljivo ponekad mašicama čistio dno gurajući lug u lugu pazeći da koja varnica ne izleti napolje... Taj lug je bio najveći neprijatelj mojih ranih godina, jer uredno utalizani sokak ligurama obično bi bio posut lugom iz kuća da ne bi neko svratio idući niz njega.

Pekar peče zemičke...

Tako je teklo godinama u mom djetinjstvu. Zli vjetrovi sudbine odnijeli su mog oca, na majci je ostalo da nastavlja tradiciju i čuva adresu. Ja sam rastao i živio sa mirisima djetinjstva iz našeg pokladrmanog sokaka smještenog malo iznad Baščašije. Blues moje kaldrme se nastavljao godinama.

D jed predstavnik Shell-a za vrijeme kraljevine, ratnik iz Vladivostoka, i moj stari, pekar u vrijeme FNRJ, pekao je zemičke kajzerice malo poviše muzičke škole u Kašikovića. Mnogo su voljeli da idu kod Juke u čačanski podrum na po jednu, družili se sa čarsijskim boemima i svaki dan je moj stari donosio zembilj hrane iz koga je virio šercl svježe ispečene štruce vraćajući se sa posla kući. K'o svaki pekar ništa neobično...Pekar Peče Zemičke...(ostalo se zviždi) Navijao je za Željku, volio Rajka Mitića, ali ne i tim za koji je Mitić igrao jer ime tima nije bilo po njegovom ukusu. Često je igrao domina i tavle sa velikim fudbalskim asom Hasetom kod Reše u kafanici na okuci gdje Kovači jure da sretnu Čaršiju u dolini. Nikad nije imao za reverom značku FK Sarajevo, navijao je za Željku, kao uspomenu koju je nosio na bivšu FK Slaviju sarajevsku. Poveo me je prvi put na Željku tekmu, mislim 1963. ili 64-te kad je slavni OFK Beograd predvođen Skoblarom i Samardžićem namlatio Željku 5:1, kad je "Čiki" Radoviću lopta zujala oke glave, kad su drvene tribine Grbavice plakale i kad sam ja postao željovac. Njegov drug beogradski i pekar Rajačić je vintao šešir od radosti, dok je otac gledao da ga neko ne opali nekom daskom od loše zakovanih tribina. Ožiljke prošlosti moj otac nikad nije pokazivao i nismo, barem ne ja, puno znali o tome. Vrijeme tadašnje bilo je vrijeme ćutanja i slušanja. Slave su se rolale iz godine u godinu, moja majka je držala do običaja, slaveći i Sv. Djordžija kao uspomenu

na svog starog ...kad bi već bašte mirisale i ono malo vočki već bilo okrećeno svježim krečom, kad bi se sa Babića Bašte razlijevala uranačka đurđevdanska pjesma dopirući i do naše bašte sa druge strane Miljacke. Stalni tim gostiju kojeg ja pamtim iz djetinjstva se polako osipao, starost i bolesti su činili svoje i odvodili paćenike u Carstva Nebeska. Nekako spontano dolazili su sinovi starih i poneki novi. Sjećam se jedne godine kad je novi snijeg zasipao kaldrmisane sokake na Sv. Arhangela... Već sam bio u stadijumu brkanja i bubuljica na licu, više sam volio slušati Doors-e, lijepiti postere po zidovima moje sobe nego sačekivati goste kao nasljednik i čuvar adrese i časkati sa nekim o temama do tada meni nepoznatim.

Računajte na nas

Svjесno ili nesvjесno, uletio sam u žrvanj tadašnjosti...kad se često na svim radio stanicama vrtila veoma poznata balada jednom presušenog mornara koja je počinjala ovako:

"Sumnjaju neki da nosi nas pogrešan tok, Dok slušamo ploče i sviramo rock, Al negde u nama je bitaka plam..."

Refrenisuišlikao "...Računajtenanas" Jedne od tih zima sam ostao u kući, zatvoren u svojoj sobi uz svoju muziku, snove, nazovimo brige i ponešto još. Pušio sam sve i svašta, volio svoj isprani gramofon i često krivio nataricu što dimi kad bi stara uletjela u sobu i osjetila miris duvana. Negdje rano u večernje sate tog dana sam izašao na sokak, zapalio, gledao kako pada snijeg i vratio se u svoje djetinjstvo gledajući stope onih koji su ih ostavljali ulazeći u našu kuću za slavu. Mahnuo sam svojoj komšinici koja je sjedila na pendžeru i gledala u svoju dugu prošlost i niz sokak. Na dnu sokaka zaustavio se auto, izašla su dva velika i pomogla trećem da izađe. Krenuli su uz brdo pješke, jer se nije moglo dalje autom, što zbog snijega, što zbog uskok sokaka. Promakli su pored mene, onaj treći kojem su dva velika pomagala da se ne otalazne bio je veliki čo'ek tadašnjeg sistema...išli su ka vratima moje avlije...otvorili ih i ušli... Ostao sam ukočen. Pogledao sam svoju konu koja je vintala brojnicu u ruci moleći se Allahu...nije mi uzvratila pogled i ja sam se vratio u svoju sobu... Bilo mi je mrsko da se penjem uz basamke na gornji sprat da vidim jel' zaista uvaženi čo'ek došao u moju kuću...sat poslije sam vidio da isti izlaze iz moje kuće i odlaze... Ja sam kasnije razgوليو sa svojom rajom, vratio se kasno u noć, kad je majka spremala sobu za goste i svijeca slavka je već bila ugašena.

Običaj iz djetinjstva da pojedem okrajke baklave iz tepsije mi je ostao i svesrdno sam navalio da ne isfoliram običaj. Kolutovi limuna sa dna prazne tepsije su bili poslastica uz baklavu. "Ko je sve bio?", pitao sam staru, obilujući prste.

"Znaš već, uvijek isti ljudi, a date interese ušao bi i pozdravio se", odvrtila je. Razgovor je bio završen za mene tinejdžera i majku. Nije bilo neke dublje temekojabinaspovezala u dužirazgovor. Jednog ljeta kad su u avliji moje komšinice cvale lale koje je ona zvala "saltirane", a fini mirisi sarajevskih loza odavao ljetni smiraj uz jedinu sarajevsku smokvu koja je rasla iz njenog podzida i kad su avlijska vrata bila otvorena i bijela kaldrma se ocrtavala na suncu, pozva me moja kona na himber kojeg je pravila od ruža i ne znam još kojeg voća...Priao je uz toplo ljeto sokaka i imao ukus limuna... Sjela je na svoju jagnječju kožu ispred vrata sokačnih sa svojom brojnicom u ruci...veliki zlatni prsten na njenom prstu je odavao uspomenu na njenog umrlog brata koji je brijaog mog pokojnog oca i često išao na po jednu u čačanski podrum na Čarsiji. Nako pogrbljena se ljuljala na jagnječjoj koži okrećući brojnicu sa 33 kuglice u ruci.

"Ti posta veliki...plah i visok na oca", reče, pa nastavi, "Tvoja majka i njena familija, ja i moja familija smo preturili velike belaje preko glave, nije nam bilo lahko...!češ zapaliti?" "Filter Beograd" sa bijelim filterom nije bio moja cigareta tih vremena, ali odbiti moju konu nije bilo korektno. Odgela se do kuhinje, 'nako pogurena, pa donijela džezvu sa kafom i dva fildžana. Umoćih nepravilnu kocku u kafu, pomakoh dugu kosu sa ramena i zapalih dok ona nastavi besjedu. Osjećao sam kad da sam na ostrvu White. "Evo vidiš teško hodam, svakom Allah dohaberi kad treba da ide...pa eto, želim da eglenišemo", nije me gledala, bila je pogurena, zabrađena maramom dok je srkala kafu sa kockom. "Trebaš da znaš da su ti rahmetli otac i majka plahi, poštene insani...nikome nisu zla nanijeli...otac ti je pomagao sirote za vrijeme nekog drugog sistema, onda je sa hljebom iz pekare 'ranio ljude...majka učila muhadžere jezik francuzicu i šila onima koji su dolazili u naš sokak kupujući kuće naših bivših komšija...znam vakat je drugačiji sada...nije ko' nekad...ali, treba da znaš da postuješ sve ono što se poštovalo i što je ovaj sokak održalo", slušao sam i osjećao da treba nešto da kaže.

"Elem' sjećaš se slave kad dođe ono veliko auto, kad sam ja sjedila na svom pendžeru, a ti pušio?" "Sjećam se," odgovorih.

"Tad dođe onaj rahmetli...kad sam drugi dan došla ti majci na baklavu i slavsku kahvu, eglenisale smo o tome".

"Majka je morala da kaže onome kome vjeruje, a to sam bila ja... povjerenje je građeno godinama za vrijeme kraljevine, rata i titovine... tajne i mi u njima su ostale u nama". "Znaš, prohaberi tvoja majka, dođe sinoć, bilo je par mojih dugogodišnjih gostiju, nastala muk, nisam znala kako da se ponašam...znam da mu je moj pokojni mnogo i onda pomagao kiflama i hljebom dok je bio u dačkom domu, bez roditelja pohađao škole...kad je trebalo pomoći, moj pokojni nije želio da traži pomoć od njega, a ja sam molila da traži". "Moja kono, uzeo je žito, jednu ljutu za slavu, izvinuo se gostima i rekao: Znaj da si imala čestitog i poštenog muža". "Taj veliki insan se baš par dana poslije tvoje slave preselio na ahiret". "Itotrebadaznasmojplahi...etojarekoh... nemoj zaboraviti ni djedove, ni babe, ni nas koji živimo zajedno", završi opet vintajući brojnicu sa 33 kugle u ruci. Očistio sam joj travu između kaldrme u avliji ostrim nožem, uzeo šlauf oprao kaldrmu...zatvorio vrata pogledavši bijelu kaldrmu i baštu u cvatu saltiranih lala i zjevtala... i ostao sam sa još jednim sjećanjem.

Nekih kasnih sedamdesetih i ranih osamdesetih...

Valjda to dodje sa godinama, kad upoznah ljubav mojih mladih dana počeh slaviti Slavu i kopkati po sjećanjima i prošlosti. Pjesma mornara bez mora više izgleda nije imala smisla.

Moja kona je umrla. Neka joj je laka zemlja. Išao sam joj na mezarje u Bare kad god sam išao svom ocu da zapalim svijeću i sačekam da cigara dogori. Kad god dođem u svoj rodni grad sa svojim pokoljenima od kojih neki ne zборе jezik mojih predaka, ponovim običaj da se ne zaboravi. Jahh... Sokak mog djetinjstva nije kao nekad...muhadžeri sa raznih strana, nekadašnji članovi radničkih savjeta i partijskih organizacija, foliranti u cokulama, voditelji televizijskih kuća, estradne zvijezde ... zaboraviše pjesmu presušenog panonskog mornara postali su veliki "vjernici" zakovavši nove zakone sokaka. Ja preživjeh belaj, srećom da pamtim Čuvare Adresa, sjećajući se Mirisa Svog Rodnog Grada...

- Mojoj pogrbljenoj koni koju pamte i golubovi koje je hranila kukuruzom uz Sebilj svakodnevno na povratku u sokak
- Mom dragom jaranu koji još Čuva Adresu malo poviš' Baščaršije i moli se Allahu za napredak svoje familije i svih kojih voli
- Jednom Mejtefu na uglu Halilbašića i Nadmlina i Staroj Crkvi na Baščaršiji koji nas učiše zajedništvu

Najveći projekti prikazani na bilbordima

Najveći projekti realizovani u Općini Stari Grad Sarajevo u posljednjih pet godina, objavljeni su na dva bilborda postavljena u Starom Gradu. Na prvom bilbordu, postavljenom preko puta Vijećnice nalazi se šest projekata, a na drugom, kod pijace Telali, prikazano je osam projekata.

OPĆINA STARI GRAD SARAJEVO
MJESTO GRADNJE I RAZVOJA

Najveći projekti 2011-2015. godine

Projekat	Procjena vrijednosti (KM)
Stambena zgrada Brusulje	cca 600.000 KM
Osnovna škola "Sadržnik"	cca 3,6 miliona KM
Stambena zgrada Baruthana (u izgradnji)	cca 150.000 KM
Pasivna kuća	cca 150.000 KM
Most Bosansko-turskog prijateljstva	cca 260.000 KM
Sportsko igralište Iza gaja	cca 150.000 KM
Stambena zgrada Baruthana (u izgradnji)	cca 300.000 KM
Stambena zgrada Baruthana (u izgradnji)	cca 300.000 KM